

Estrella Campeon Antiyano na 1970

Pa e campeonato 1969/1970 Estrella a titula sub-campeon tras di Dakota y a haya e derecho pa hunga den e Copa Antiyano. Estrella a cuminza e campeonato aki cu un derota di 3 – 2 contra Jong Colombia na Corsow. Despues Estrella a recupera y a gana tanto Dakota na Aruba como S.U.B.T. na Corsou. E di dos wega contra Dakota a bira un derota di 3 – 1. Hungando su ultimo dos weganan na Aruba Estrella a gana Jong Colombia 1 – 0 cu gol anota pa Betico Dubero faltando ocho minuut pa e wega caba y S.U.B.T. 2 – 0 cu golnan di Dechi Bislip y Esie Croes. Cu e victoria aki Estrella a empata cu Dakota na prome lugar y mester a hunga dos wega di desempate. E prome wega Estrella a gana 1 – 0 ora cu Esie Croes a score e unico gol faltando apenas tres minuut pa e wega caba. Dakota a gana e di dos wega 2 – 1 y asina a forza un di tres wega cu lo ta decisivo. Dia 20 di Juni di 1970 Wilhelmina Stadion no tawata tin mas lugar pone hende e di tres wega aki. Cu golnan di Betico Dubero y Candi Wernet halftime a yega cu Estrella dilanti 2 – 0. Tres minuut despues di sosiego Mai Ras a haci wega 3 – 0. Despues di e gol aki Dakota a cuminsa pone e gol di Estrella bao di un presion enorme y Freddy Kersen a score dos biaha pa haci e wega 3 – 2. E di dos gol a cay faltando ainda diesocho minuut pa e wega caba pero Estrella a defende cu alma y curpa y tabata e keeper Janchi Croes cu na dos ocasion a luci cu e gol di empate no a cay. E ultimo cinco minuutnan Estrella a bolbe domina e wega y Dakota no a bira peligroso mas. Asina Estrella a bira e di dos y e ultimo equipo di Aruba pa titula campeón Antiyano. Mas di 14.000 hende a paga mas di 21.000 florin pa mira e tres weganan aki. E alineacionnan pa e ultimo wega aki tabata lo siguiente.

Estrella	
Keeper:	Janchi Croes
Defensa:	Camel Jansen – Walty Croes – Roman Kock – Andresito Bikker
Medio campo:	Candi Wernet – Fenchí Dubero
Dilanti:	Betico Dubero – Mai Ras – Esie Croes – Dechi Bislip
Cambio:	Maiky Rasmijn pa Candi Wernet y Dooy Werleman pa Betico Dubero
Dakota	
Keeper:	Yubi Richardson
Defensa:	Herman Dumfries - Juancho Pablo – Jenny Loefstok – Urbano Kock
Medio campo:	Eric Zievinger – Jimmy Richardson
Dilanti:	Henki Braafharts – Freddy Kersen – Richard Jacobs – Meew Loefstok
Cambio:	Bobon Richards pa Henki Braafharts y Frank Richardson pa Eric Zievinger

Otro hungadornan di Estrella e aña aki tabata: Foito Albertsz, Feliz Geerman, Luis Rasmijn, Dodo Franken y Ale Vrolijk, Yonko Albertsz no a hunga den e Copa Antiyano aki ya cu el'a kibra su pia durante e campeonato regular contra Dakota.

	H	G	E	P	Pto	GF	GC	
Estrella	3	2	0	1	4	5	4	Campeon
Dakota	3	1	0	2	2	4	5	Sub-Campeon

Fundacion SV Estrella

Tabata na aña 1947 cu Frere Fedricus, cabezante di Sint Jozef School, notando cu e alumnonan di su school no tabata tin nada di haci despues di school, a bin riba e idea pa cuminsa organiza actividadnan deportivo y recreativo pa e muchanan aki. E bon Frere Fedricus a cuminsa den Club San Martin (Club di Pastoor y awor Centro San Martin), cu un grupo chikito. Tur diasabra y despues tambe riba diadomingo e muchanan tabata bini hunto pa practica diferente ramo di deporte y alavez recrea nan mes. E grupo chikito aki a cuminsa dia pa dia bira mas grandi y Frere a mira e necesidad pa busca mas Frere y hende grandi pa yude den su trabou pa hubentud.

Frere Federicus cu un deseo grandi pa yuda e hobenan aki a acerca su otro coleganan maestro na school, esta Frere Emberto y Frere Norberto pa yude pa asina hunto acerca Stichting Jeugdcentrale La Salle cu e peticion pa forma un organizacion pa e hobennan aki.

Cu aprobacion di Stichting Jeugd centrale La Salle, Sint Jozefbond
 “Estrella” a keda funda oficialmente dia
 1 september 1948.

